

րի գազաթափողովների կարևոր դերակատարությանը՝ ի դեմս դեսպանի իր գնահատանքը հայտնելով Ղազախստանի իշխանություններին այն վերաբերմունքի և հարգանքի համար, որ ցուցաբերվում է Ղազախստանում կրոնների նկատմամբ, և հասարակության մեջ դրանց առաքելության կարևորման համար:

Հանդիպմանն անդրադարձ եղավ նաև Ղազախստանի հայ համայնքին, մեր երկու երկրների միջև առկա տնտեսական գործակցությանը:

**Ն.Ս.Օ.Տ.Տ. ԳԱՐԵԳԻՆ Բ ԱՄԵՆԱՅՆ ՀԱՅՈՑ ԿԱԹՈՂԻԿՈՍՆ
ԸՆԴՈՒՆԵՑ ՀԱՄԱՀԱՅԿԱԿԱՆ ԵՐԻՏԱՍԱՐԴԱԿԱՆ ՄԻՋԱԶԳԱ-
ՅԻՆ ԽՈՐՀՐԴԱԺՈՂՈՎԻ ՄԱՍՆԱԿԻՑՆԵՐԻՆ**

Հուլիսի 11-ին Մայր Աթոռ Սուրբ Էջմիածնում Ն.Ս.Օ.Տ.Տ. Գարեգին Բ Ծայրագույն Պատրիարք և Ամենայն Հայոց Կաթողիկոսն ընդունեց «21-րդ դարի մարտահրավերները և հայ երիտասարդությունը» համահայկական երիտասարդական միջազգային խորհրդածողովի մասնակիցներին:

Տիար Վլադիմիր Ադայանը, շնորհակալություն հայտնելով Նորին Սրբությանն ընդունելության համար, Վեհափառ Հայրապետին ներկայացրեց խորհրդածողովի աշխատանքները և քննարկված հիմնախնդիրները:

Ապա երիտասարդներին Հայրապետական օրհնության և գնահատանքի իր խոսքն ուղղեց Ամենայն Հայոց Կաթողիկոսը: Ողջունելով խորհրդածողովի մասնակիցների այցն ամենայն հայոց հոգևոր կենտրոն՝ Նորին Սրբությունը կարևոր նկատեց երիտասարդության ներգրավվածությունը հայ ժողովրդի առջև ծառայած մարտահրավերների լուծման գործում:

Վեհափառ Հայրապետը գոհունակությամբ հաստատեց, որ Հովվապետական այցերի ժամանակ աշխարհի տարբեր երկրներում տեսել է նախանձախնդիր հայ երիտասարդություն՝ հետամուտ ազգային խնդիրների լուծմանը: *«Ազգային ոգու վերարթնությունը երաշխիքն է ազգային ինքնության պահպանության»*, - ասաց Գարեգին Բ Կաթողիկոսը՝ առկա հիմնախնդիրների հաղթահարման ճանապարհ նկատելով հոգևոր միասնականությունը, ազգի միաբանությունը և համընդհանուր ջանքերի մեկտեղումը:

Նորին Սրբությունը հորդորեց երիտասարդներին իրենց գիտելիքներն ու կարողություններն ի սպաս դնել հայ ժողովրդի և մեր Հայրենիքի բարգավաճմանը՝ մշտապես հայացքներն ուղղյալ պահելով դեպի Հայրենիք, Արարատ և Սուրբ Էջմիածին:

**Ն.Ս.Օ.Տ.Տ. ԳԱՐԵԳԻՆ Բ ԱՄԵՆԱՅՆ ՀԱՅՈՑ ԿԱԹՈՂԻԿՈՍՆ
ԸՆԴՈՒՆԵՑ ՀԱՐԱՎԱՅԻՆ ՌՈՒՍԱՍՏԱՆԻ ՀԱՅՈՑ ԹԵՄԻ
ՈՒԽՏԱՎՈՐՆԵՐԻՆ**

Հուլիսի 27-ին Ն.Ս.Օ.Տ.Տ. Գարեգին Բ Ծայրագույն Պատրիարք և Ամենայն Հայոց Կաթողիկոսն ընդունեց Հարավային Ռուսաստանի հայոց թեմի Պյատիգորսկ քաղաքի Ս. Սարգիս եկեղեցու «Գարեգին Բ Կաթողիկոս Ամենայն Հայոց» կիրակնօրյա դպրոցի՝ Հայաստան ուխտի եկած ուսուցիչներին ու սաներին՝ գլխավորությամբ Պյատիգորսկի Ս. Սարգիս եկեղեցու հոգևոր հովիվ Տ Արամ ավագ քահանա Հունանյանի:

Ողջունելով ուխտավորներին՝ Վեհափառ Հայրապետը կարևոր համարեց ուխտագնացության միջոցով Հայրենիքի հետ կապի ամրապնդումը, որը խիստ տարբեր է սովորական այցելությունից. *«Ուխտի գալ Հայրենիք՝ նշանակում է նվիրական զգացումներով գալ և այդ նվիրական զգացումներն այստեղ սնել հայրենի պատմությամբ ու ներկայով»:*

Մայր Աթոռ Սուրբ Էջմիածնում ստանալով Ամենայն Հայոց Կաթողիկոսի օրհնությունը՝ ուխտավորներն առաջիկա մի քանի շաբաթների ընթացքում կշարունակեն ուխտագնացությունները դեպի հայրենի երկրի տարբեր սրբավայրեր:

Ն.Ս.Օ.Տ.Տ. ԳԱՐԵԳԻՆ Բ ԱՄԵՆԱՅՆ ՀԱՅՈՑ ԿԱԹՈՂԻԿՈՍՆ ԸՆԴՈՒՆԵՑ ԱՄՆ ՀԱՅՈՑ ԱՐԵՎԵԼՅԱՆ ԹԵՄԻ ՈՒՍԱՎՈՐՆԵՐԻՆ

Հուլիսի 27-ին Ն.Ս.Օ.Տ.Տ. Գարեգին Բ Ծայրագույն Պատրիարք և Ամենայն Հայոց Կաթողիկոսն ընդունեց ԱՄՆ հայոց Արևելյան թեմի Եկեղեցասեր երիտասարդաց միության ASP-ի (Հայ կրթական ծրագիր) մասնակիցներին՝ գլխավորությամբ Քլիվլենդի Ս. Գրիգոր Նարեկացի եկեղեցու հոգևոր պատասխանատու Բարեշնորհ Արտակ սարկավագ Խաչիկյանի: ASP-ի շուրջ 30 մասնակիցները Հայաստանում էին հուլիսի 7-ից և այդ ընթացքում իրենց նպաստն են բերել Գուգարաց թեմի «Ծիծեռնակ» ճամբարում անցկացվող անգլերեն լեզվի և այլ առարկաների դասընթացներին, ինչպես նաև ուխտի մեկնել Հայաստանի տարբեր սրբավայրեր:

Նորին Սրբությունը ողջունեց ուխտավորներին և իր ուրախությունը հայտնեց նրանց տեսնելու Հայրենիքում և Մայր Աթոռ Սուրբ Էջմիածնում: Վեհափառ Հայրապետն իր խոսքում ընդգծեց Հայ Եկեղեցու առանցքային տեղն ու դերը Հայրենիք հասկացության մեջ. *«Հայ Առաքելական Եկեղեցին ոգին է Հայրենիքի: Հայրենիք հասկացությունը միայն հող, տարածք չէ, այլ նաև այն հոգևոր արժեքները, որ մեր հայրերը կերտել են այս հողի վրա: Մեր Եկեղեցու զավակների հոգու և մտքի արգասիք այդ արժեքները ստեղծվել են շնորհիվ Հայ Եկեղեցու կրթադաստիարակչական աշխատանքի ու գործունեության»:*

Ավարտելով իրենց առաքելությունը և ստանալով Ամենայն Հայոց Կաթողիկոսի օրհնությունը՝ ուխտավորները վերադարձան ԱՄՆ:

*ՄԱՅՐ ԱԹՐՈՒ ՍՈՒՐԲ ԷԶՄԻԱԾՆԻ
ՏԵՂԵԿԱՏՎԱԿԱՆ ՀԱՄԱԿԱՐԳ*